

Hubungan Baik M'sia-Indonesia Lebih Erat Jika Fahami Budaya & Sejarah
mStar Online
September 24, 2011
Daripada ARIFFUDDIN ISHAK

PADANG (INDONESIA): Hubungan baik antara Malaysia-Indonesia dapat dipertingkatkan menerusi penekanan dan pemahaman yang lebih mendalam mengenai aspek sejarah serta sosio budaya kedua-dua negara.

Menteri Penerangan, Komunikasi dan Kebudayaan, Datuk Seri Dr Rais Yatim berkata, penerokaan terhadap sejarah kedua-dua negara yang mungkin membawa kepada beberapa penemuan mengenai kerjasama lampau dapat menjadi tali perhubungan demi pembangunan masa depan.

"Amat penting untuk kedua-dua negara mengenali pertalian budaya dan sejarah masing-masing.

"Jadi ingin saya cadangkan agar aspek sejarah dan budaya kedua-dua negara serumpun ini diberi perhatian untuk dijadikan tali perhubungan dan perjuangan kita di masa depan," katanya ketika berucap pada majlis sambutan delegasi Malaysia sempena Program Pertemuan Wartawan dan Budayawan Indonesia-Malaysia di Bukit Tinggi di sini, Jumaat.

Delegasi Malaysia disambut Gabenor Sumatera Barat, Irwan Prayitno. (Di Indonesia, Gabenor adalah setaraf dengan Menteri Besar atau Ketua Menteri di Malaysia).

Selain itu Rais berkata, walaupun usaha berkenaan adalah sesuatu yang mencabar kerana bakal mewujudkan pelbagai sentimen, namun ia diyakini dapat diatasi dengan baik menerusi pelbagai program kerjasama kedua-dua negara.

Tambah beliau, percantuman aspek sejarah selain elemen budaya dan bahasa yang sudahpun menjadi jambatan terhadap hubungan baik Malaysia-Indonesia akan mewujudkan identiti yang lebih cerah.

"Saya sedar ini bukan satu penerokaan yang mudah kerana sudah pasti akan mewujudkan pelbagai pandangan dan sentimen...namun sebagai pemimpin yang ada kaitan dengan budaya dan sejarah, kita akan cuba cantumkan tenaga dan rancang pelbagai program berterusan yang akhirnya akan dapat wujudkan identiti menerusi sejarah dan budaya.

"Inilah fungsi sejarawan dan budayawan kedua-dua negara kerana mereka akan bertukar pandangan dan pendapat. Penemuan baru ini akan menyatukan perasaan serta kegiatan lampau kedua-dua negara," katanya.

Hakcipta Terpelihara © 1995-2011 Star Publications (Malaysia) Bhd

Source:

http://www.mstar.com.my/berita/cerita.asp?file=/2011/9/24/mstar_berita/20110923181217&sec=mstar_berita